

Script of Evening Gojri News Bulletin 11 December 2024 at 1700 Hrs

ایوننگ گو جری نیوز بلیٹن مور 11 دسمبر 2024

یوہ آکا شوانی جموں ہے ظفر اقبال تے عبید الرحمان تیں خبر سنو۔ پہلاں خاص خاص خبر۔

*1۔ مرکزی وزیر تعلیم دھرمیندر پردھان نے کہیو ہے کہ طالب علم ہی وکست بھارت غا اہم ستون ہیں اور اُن غی صلاحیت اور ایجادکاری عالمی سطح ور درپیش مشکلاں غا حل تلاش کرن مانہ اہم کردار ادا کریں۔

*2۔ ریلوے غا مرکزی وزیر اشونی ویشنو نے کہیو ہے کہ ملک غے اندر ریلوے سٹیشن غی از سر نو ترقی غو سب تیں بڑو پروگرام شروع کیو گیو ہے۔

*3۔ مرکزی وزیر ڈاکٹر جتندر سنگھ نے کہیو ہے کہ آئی گوٹ کرم یوگی پلیٹ فارم ور 49 لکھ تیں متا ملازمین 15 سو کورساں مانہ شامل ہو رہیا ہیں۔

*4۔ تے نائب وزیر سریندر کمار چودھری نے تعلیم غی توسیع اور نوجوان نسل غے اندر اخلاقی قدراں تے عملی پہلو ور توجہ دین غی اہمیت ور روشنی پائی ہے۔

خبراں غی تفصیل نال پہلاں باغ عبید الرحمان۔

Pradhan SIH

مرکزی وزیر تعلیم دھرمیندر پردھان نے اج ویڈیو کا نفرنسنگ غے ذریعے سمارٹ انڈیا ہیکتھان 2024 غو افتتاح کیو۔ اس افتتاحی تقریب مانہ شمال مشرقی علاقہ غے اندر تعلیم تے ترقی غی وزیر مملکت ڈاکٹر سکانتا مجمدار وی موجود تھیں۔ اس تیں علاوہ وزارت تعلیم غا سیکریٹری، این ای ٹی ایف غا چیرمین، آے آئی سی ٹی ای گا وائس چیرمین تیں علاوہ کئی دیگر اعلیٰ عہدیدار وی موجود تھا۔ اس تیں علاوہ ملک غا بکھ بکھ حصاں تیں کئی طالب علم اس تقریب مانہ ویڈیو کا نفرنسنگ غے ذریعے جڑیا۔ وزیر تعلیم نے اپنا خطاب مانہ سمارٹ انڈیا ہیکتھان سوچ ور وزیر اعظم غو شکریو ادا کیو۔ موصوف نے کہیو کہ طالب علم ملک غو قیمتی اثاثو ہیں۔ اور وکست بھارت مشن مانہ ان طالب علماں غو اہم کردار رہ گو۔ موصوف نے مزید کہیو کہ ملک غا نوجواناں غی سوچ تے صلاحیت بھارت نانہ 21 ویں صدی مانہ علمی معیشت بناویں گی اور عالمی سطح ور ترقی گا نواں رستہ باندے آویں گا۔

SIH Jammu

سمارٹ انڈیا ہیکتھان 2024 تقریب اج آئی آئی ٹی جموں مانہ شروع ہوئی جس مانہ پورا ملک تیں ایجاد کار تے ڈونگی سوچ رکھن آلا افراد حصولے رہیا ہیں۔ جہیزا جے حقیقی دُنیا مانہ درپیش مسنلاں گا حل بارے سوچ وچار کریں گا۔ اس تقریب غو موضوع ”نوی ایجاد غی طاقت، نوی ایجاد غی بنیاد“ رکھیو گیو ہے۔ اس تقریب مانہ نوجوان طبقہ غا افراد بکھ بکھ معاملات ور اپنا خیالات تے اپنی سوچ سانجی کریں گا۔ جن مانہ سائبر سکیورٹی، ذراعت، صحت متعلق معاملات، سمارٹ سیٹی تے پائیدار ترقی جیسا معاملات شامل ہیں۔ اس ہیکتھان تقریب غو افتتاح آئی آئی ٹی جموں غا اسسٹنٹ پروفیسر ڈاکٹر وجے کمار پال نے کیو۔ اس دوران جموں بجلی تقسیم کاری کارپوریشن لمیٹڈ غا منیجنگ ڈائریکٹر چودھری محمد یاسین مہمان خصوصی تھا۔ موصوف نے قوم غی تعمیر و ترقی

مانہہ نوی ایجادات غی اہمیت ور روشنی پا ئی۔ اس تقریب مانہہ آئی آئی ٹی جموں غا دائریکٹر پروفیسر منوج سنگھ گوہر نے وی تقریب مانہہ حصول نال آلا طالب علما نال خطاب کیو اور کہیو کہ اج غا وقت مانہہ مشکلات غا حل واسطے کس طریقہ نال مصنوعی ذہانت اور آئی او ٹی غی مدد لی جاسکیں۔ اس موقعہ ور بولتاں واں آئی آئی ٹی جموں غا ڈائریکٹر پروفیسر منوج سنگھ گوہر نے اس طرح کہیو۔۔۔ بائٹ۔۔ اس تقریب مانہہ پی ڈی سی جموں غا ڈائریکٹر چودھری محمد یاسین نے اس طرح کہیو۔۔۔ بائٹ۔۔ اس تقریب مانہہ شرکت کرن آلا کُجھ افراد نے مہارا نما نندہ نال گل بات کرتاں واں اپنا تاثرات کُجھ اس طرح پیش کیا۔۔۔ بائٹ۔۔۔

LS Vaishnav Railways

ریلوے غا مرکزی وزیر اشونی ویشنو نے کہیو ہے کہ مُلک غے اندر عالمی سطح غا سب تیں بڑا ریلوے سٹیشن غی از سرنو ترقی پروگرام غی شروعات کی گئی ہے۔ جس نال 1 ہزار 3 سو 24 سٹیشن ناہہ فائدو حاصل وے گو۔ لوک سبھا مانہہ اج اک سوال غا جواب غے دوران جناب ویشنو نے کہیو کہ یوپی اے سرکار غا مقابلہ مانہہ بھارت غے اندر ریلوے سیکٹر مانہہ 9 گنا زیادہ پیسو خرچ کیو جا رہیو ہے۔

LS Vaishnac AI

الکٹرانگ تے آئی ٹی غا مرکزی وزیر اشونی ویشنو نے کہیو ہے کہ سرکار مصنوعی ذہانت غا تناظر مانہہ قانون بنان واسطے تیار ہے۔ وزیر موصوف نے اک سوال غو جواب دیتاں واں کہیو کہ جناب مودی ٹیکنالوجی غی جمہوریت ور یقین رکھیں اور اُن نے غریب تیں غریب آدمی ناہہ وی ٹیکنالوجی نال متعارف کرایو ہے۔ وزیر موصوف نے کہیو کہ مُلک غے اندر اک جامع اے آئی مشن غی شروعات ہو چکی ہے۔ اور اس غا 7 ستون ہیں۔ وزیر موصوف نے دسیو کہ اُن آلا وقت مانہہ اے آئی غو بٹر حاصل کرن واسطے 8 عشریہ 6 لکھ افراد غو اندراج ہو چکو ہے۔ اور یوہ پلیٹ فارم تربیت دین آلی صنعت غا سانجا تال میل نال تیار کیو گیو ہے۔ جہیڑو جے متعلقہ شعباں واسطے کافی فائدہ مند وے گو۔

PM Pranab Mukherjee

صدر جمہوریہ دروپدی مُرمو، وزیر اعظم نریندر مودی تے وزیر داخلہ امت شاہ نے بھارت غا سابق صدر پرنا ب مکھرجی غا یوم پیدائش ور خراج عقیدت پیش کیو ہے۔ سوشل میڈیا پوسٹ ور جناب مودی نے سابق صدر بارے اپنا تاثرات پیش کرتاں واں کہیو کہ پرنا ب مکھرجی بابو اک نرم دل انسان تھا اور عوام غا دِلان مانہہ بسیں تھا۔ وے اک بہترین منظم وی تھا، اور بہترین حکمت عملی اپنا ویں تھا۔ جناب مودی نے کہیو کہ سابق صدر غا مُلک غے تنیں کردار ناہہ ہمیشہ یاد رکھیو جائے گو۔ وزیر داخلہ امت شاہ نے وی سابق صدر غی انتظامیہ صلاحیت ور روشنی پائی اور کہیو کہ پرنا ب مکھرجی نے قومی انتظامیہ غے اندر بڑا اہم کردار ادا کیا۔

PM Gita Jayanti

وزیر اعظم نریندر مودی نے اج گیتا جینتی غا موقعہ ور لوکاں ناہہ مبارک باد پیش کی ہے۔ اک سماجی میڈیا پوسٹ مانہہ جناب مودی نے کہیو ہے جے یوہ پو یتر تہوار

اعلیٰ صحیفہ غا جنم تہاڑا غی یاد دلاوے۔ جس نے بھارتی تعلقات تے رسم و رواج غی رہنمائی کی ہے۔ وزیر اعظم مودی نے بھگوان شری کرشنا نانہہ یاد کرتاں واں کہیو ہے جے بھگوت گیتا ہر اک نانہہ کرم یوگا غا رستہ ور چلن غو رستہ دسے۔

یہ خبر تم آکاشوانی جموں تیں سن رہیا ہیں خبراں غا باقی حصہ نال ظفر اقبال۔

LS KaramYogi

مرکزی سرکار نے دسیو ہے جے آئی کوٹ کرم یوگی پلیٹ فارم ور دستیاب 15 سو مختلف کورساں مانہہ 49 لکھ سرکاری ملازماں نے حاضری لائی ہے۔ اس گل غی جانکاری اج لوک سبھا مانہہ پوچھیا گیا اک سوال غا جواب مانہہ دیتاں واں وزیر مملکت ڈاکٹر جتندر سنگھ نے دتی۔ انہاں نے دسیو ہے آئی کوٹ کرم یوگی پلیٹ فارم ور 2 عشاریہ 7 کروڑ اندراج ہوا ہیں۔ اور اک عشاریہ 9 کروڑ کورس مکمل ہو چکا ہیں۔ وزیر مملکت نے مزید جانکاری دیتاں واں دسیو ہے اس سلسلہ مانہہ 5 سو 11 کروڑ روپیہ وی منظور کیا گیا ہیں۔

Dy CM Education

جموں کشمیر کا نائب وزیر اعلیٰ سریندر کمار چودھری نے تعلیمی نظام غا دائرہ نانہہ وسعت دین غی اہمیت نانہہ اُجاگر کرتاں واں کہیو ہے جے نوجوان نسل نانہہ ضرورت ہے جے واہ تعلیم حاصل کر غے تعلیم توں اپنی زندگی مانہہ عملی تے اخلاقی خوس اسلوبیاں نانہہ اپناویں۔ جناب چودھری نے مزید کہیو ہے نوجوان نسل بہتر طریقہ سنگ تعلیم حاصل کر غے ملک غی ترقی مانہہ اپنو نمایاں کردار ادا کر سکے۔ نائب وزیر اعلیٰ نے یہ گل گذشتہ کل جموں غا اک اسکول مانہہ منعقدہ پروگرام سنگ خطاب کرن غے دوران کہی۔ انہاں نے مزید کہیو ہے تعلیم نانہہ مجموعی طور ور زیادہ بنان غی لوڑ ہے۔ نائب وزیر اعلیٰ نے اپنا خطاب غے دوران مزید کہیو ہے علم نانہہ عملی تے اخلاقی طور ور حاصل کر غے نوجوان دوجاں غی رہنمائی کر سکیں۔ نائب وزیر اعلیٰ نے اسکول غی حوصلہ افزائی کرتاں واں کہیو ہے وے نوجوان ذہناں نانہہ تراشن مانہہ بھرپور کوشش کر رہیا ہیں تے اس طرح غی تعلیمی تقریب منعقد کران توں مستقبل وی بہتر ہو سکے۔

CS SEC

چیف سیکریٹری اتل ڈلو نے گذشتہ روز ایس ڈی آر ایف غی ایس ای سی میٹنگ غے دوران قدرتی آفات غی بازآبادکاری غا اصولاں غے تحت 5 مزید مقامی آفات نانہہ موجودہ فہرست مانہہ شامل کیو ہے۔ اس اعلیٰ سطحی میٹنگ غے دوران شامل کی گئی 5 آفات مانہہ گلشئیر جھیل غے اندر آٹھن آلا طوفان، چڑک، بجلی پین نال ہون آلا نقصان، پہاری ہرباری، انساناں ور جانوراں غا حملہ تے کشتیاں غا پانی مانہہ الٹ جانو شامل ہیں۔ اس میٹنگ غے دوران موجودہ ایس ڈی آر ایف عملہ نانہہ مزید فعال بنان خاطر 6 عشاریہ 5 کروڑ روپیاں غی رقم واگذار کرن غو وی اعلان کیو گیو۔ اس ضمن مانہہ ایس ای سی نے 6 کروڑ روپیہ ضلع ترقیاتی کمشنراں جن مانہہ باہمولہ، گاندربل، کپواڑ، ہ، سرینگر راجوری تے رام بن غا حق مانہہ رقم نانہہ منظور کرن غو حکم صادر کیو ہے۔

DC Poonch

ضلع ترقیاتی کمشنر پونچھ وکاس کنڈل نے اج تحصیل سرنکوٹ غا دور دراز گراں مربوٹ مانہہ اک عوامی دربار لا غے لوکاں غی مشکلات سُنیں۔ تقریب غے دوران اُنہاں نے مقامی لوکاں غی مشکلات غور سنگ سُنن تیں بعد اُنہاں نانہہ یقین دہانی کرائی ہے جے اُن غی تمام مشکلات نانہہ ویلے سر دور کیو جائے گو۔ اس پروگرام مانہہ متی تعداد مانہہ مقامی لوکاں نے شمولیت کر غے ڈی سی موصوف نانہہ بنیا دی چیزاں غی ضرورت پارے دسیو جن مانہہ رُک رابطو، صحت نظام، تعلیم شامل ہے۔ مہارا ضلع نمائندہ انوبھو مصری نے دسیو ہے جے اس منعقدہ کیمپ غے دوران ہی مقامی لوکاں غی مچ ساری پریشانیاں نانہہ موقعہ ور ہی حل کیو گیو۔ ڈی سی موصوف نے کہیو جے اس طرح غا کیمپ منعقد کرن توں لوکاں تے انتظامیہ غے بشکار دوری کھٹ ویں۔

JKAACL BBU

جموں کشمیر اکیڈمی برائے فن ثقافت تے لسانیات نے اج کے ایل سہگل حال جموں مانہہ بھاشا اُنسو 2024 منعقد کرایو۔ یاہ تقریب منعقد کر غے بھارت غا مشہور شاعر مہا کوی سُبرامنیا بھارتی جہیزا جے جدید بھارت غا اک بڑا ادبی شاعر تھا اُن نانہہ خراج عقیدت پیش کیو۔ اس پروگرام مانہہ بکھ بکھ زبانان گا مشہور لکھاڑیاں نے وی شمولیت کی۔ اس پروگرام غی صدارت اکیڈمی غی سیکریٹری ہر ویندر کور کر رہی تھیں۔ اس منعقدہ پروگرام مانہہ مشہور ڈوگری تے ہندی لکھاڑی ڈاکٹر نرمل ونود نے وی خطاب کیو۔ ہر ویندر کور نے اپنا خطاب غے دوران مہا کوئی سُبرامنیا بھارتی نانہہ یاد کرتاں واں کہیو جے اُنہاں نے تامل ادب غے علاوہ 32 دیگر زبانان مانہہ وی بہترین کم کیو ہے، تے اس تیں علاوہ اُنہاں نے 3 بیرونی زبانان مانہہ وی اپنی خدمات پیش کی ہیں۔

اس غے نال ہی خبراں غو یوہ بلیٹن ختم ہوو۔